

中華名勝古蹟目錄

第七編 江蘇

一 南京……………一一一五

鍾山 清涼山 第二泉 半山寺 元武湖 莫愁湖 秦淮河 桃葉渡 雨花臺 三台洞 幕府山 句曲山 青溪九曲 景陽井 黃天蕩 棲霞山 邀笛步 謝公墩 烏衣巷 明故宮 東山 孫楚酒樓 夢筆驛 草堂 太子松 達摩宴坐石

二 揚州……………一五一二一

小金山 平山堂 文選樓 董井 迷樓 隋堤 二十四橋 陳公塘 騎鶴樓 賦詩臺 瓊花臺 雲山閣 文遊臺 古香堂 拱極臺 文峯塔

三 淮安……………二一一—二四

鉢池山 洪澤湖 袁公路浦 金牛岡 高家堰 劉伶臺 胯下橋 千金亭

四

徐州

..... 一一四——三三

皇藏峪 三台山 白駒山 桓山 箕谷 豐西澤 鄭坡 圯橋 戲馬臺 黃

樓 歌風臺 放鶴亭 朱陳村 逍遙堂 萃墨亭 燕子樓

五

海州

..... 三三一——三五

萬花崖 羽山 孔望山 鬱林島 望海樓 孝婦祠

六

蘇州

..... 三五——四九

虎邱 鄧尉山 天平山 靈巖山 太湖 尚湖 虞山 辛峯亭 昭明讀書臺

言子墓 虞仲墓 雅集亭 小三台 興福寺 君子泉 印心石室 清涼禪寺

拂水禪院 劍門 石屋洞 桃源澗 望海墩 小石洞 老石洞 胥山 滄浪

亭 樂圃 南園 赤松子煉丹臺 生公說法臺 響屨廊 桃花塢 寶帶橋

錦帆涇 館娃宮 獅子林 陸龜蒙宅 寒山寺 元妙觀 五人墓 要離墓

貞娘墓

七 松江

機山 橫雲山 瑯湖 五色泉 折桂閣 二陸草堂 顧亭林宅 居竹書屋

白石山寮 白燕巢墓

八 上海

黃浦 藏書樓 博物院 天文臺 愚園 雙清別墅 愛儷園 半淞園 六三

園 東園 西園 華人公園 西人公園 新公園 兒童公園 龍華寺 第六

泉 綠雲洞 龍華塔 龍井 玉玲瓏 古鳴鶴橋 瓶山 黃歇渡

九 太倉

寶山 東園 弇山園 春水船 樂隱園 畏壘亭

十 常州

惠山 天下第二泉 石門 頭茆峯 二茆峯 三茆峯 竹爐山房 春申澗

中華名勝古蹟 第七編 目錄

四

金蓮池 寄暢園 梅園 五里湖 至德祠 東陂石 萬壽亭 文筆塔 陶園
黃山 善卷洞 梅花隴 九曲亭 伯牙琴臺 任公釣臺 吳季札墓

十一 鎮江……………七七—七七

金山 焦山 北固山 五州山 中冷泉 虎跑泉 黃鶴山 投金灘 尊湖
孫夫人梳妝臺 梁夫人擂鼓處 聽鸚山房 望簫樓 西園 研山園 丁卯橋
藏春隴 丹徒宮 鐵甕城 瘞鶴崖

十二 通州……………七七—八〇

五公園 博物院 狼山 軍山 劍山 玉涓泉 海山樓 芙蓉園 棲雲閣
胡定安故宅

中華名勝古蹟

第七編 江蘇

一 南京

南京城瀕於揚子江西岸。周七十六里有奇。凡十有三門。其廣大過於北京。三國吳、東晉、劉宋、南齊、梁、陳皆建都於此。謂之六朝。南唐李氏及明太祖建文二帝又都之。有金陵、秣陵、建康、昇州、集慶等之異名。民國臨時政府曾設於此。今督軍駐焉。自下關開作商埠。滬寧鐵路以此爲終點。又撥官款接軌入金川門。直達督軍衙署。及中正街。

鍾山

鍾山在朝陽門外三里許。孫權曾改名蔣山。岡巒盤環。巖泉清麗。諸葛武侯所謂鍾山龍蟠也。上有吳大帝陵及明太祖陵。靈谷寺在其東。西巖下有招

隱館爲雷次宗書室。次宗字仲倫。隱居不仕。劉宋元嘉十五年。徵至都下。開館於雞籠山。聚徒教授。生徒百餘人。後築室於鍾山。名其館曰招隱。山上有蔣侯祠。漢末蔣子文討賊。戰死於山下。立祠祀之。宋蘇軾同友人遊蔣山詩云。到郡席不煖。居民空惘然。好山無十里。遺恨恐他年。欲款南朝寺。同登北郭船。朱門收畫戟。紺宇出青蓮。夾路蒼髯古。迎人翠麓偏。龍腰蟠故國。鳥爪寄層巔。竹杪飛華屋。松根泣細泉。峰多巧障日。江遠欲浮天。略約橫秋水。浮圖插浮煙。歸來踏人影。雲細月娟娟。

清涼山

清涼山在江寧縣漢西門內。上有翠微亭。掃葉樓。清涼寺。諸勝蹟。翠微亭在山之巔。建自南唐。掃葉樓在其西。明末龔半千讀書於此。山半有清涼寺。寺有李煜八分書題名。李蕭遠草書。董羽畫海水。世稱爲三絕。袁子才隨園在其山麓。樹木幽深。遊人至此。如入清涼世界。脫離紅塵矣。又有諸葛武侯祠。

馬端肅祠。曾文正祠。沈文肅祠。徐錫麟祠。足供遊覽。按馬端肅公諱文升。有文武才。長於應變。登明景泰二年進士。授御史。歷按山西湖廣。風裁甚著。成化初。召爲南京大理御史。平允明決。朝端有大議。往往待之決。功在邊鎮。邇遐皆聞其名。曾文正公諱國藩。清道光年舉翰林。咸豐三年。洪秀全陷九江。公創辦團練。湘軍之名自此始。奉命討洪。楊公知人善任。舉塔齊布。羅澤南。楊載福。彭玉麟等。推心置腹。委用各盡其才。卒能成其大功。累官至大學士。封一等毅勇侯。死之日。江南士民家家繪像以祀之。追贈太傅。詔各省建立專祠。沈文肅公諱葆禎。舉道光進士。同治元年。巡撫江西。調遣諸將。所向克捷。光緒元年。卒於兩江總督任所。贈太子太保。徐錫麟。浙江紹興人。首創革命。刺恩銘。被執而死。有功民國。

第二泉

第二泉在雨花臺山中。旁有石子岡。以產石子名。方正學墓在其巔。明方孝

孺字希直。自幼警敏。雙眸炯炯。讀書日盈寸。鄉人目爲小韓子。長從宋濂游。濂及門。多天下知名士。未幾。孝孺駕乎其上。洪武十五年。以薦召見。太祖喜其舉止端整。謂皇孫曰。此莊士。當老其才。禮遣還。蜀獻王聞其賢。聘爲世子師。每見必陳說道德。王尊以殊禮。名其讀書之廬曰正學。建文卽位。召爲翰林侍講。明年遷學士。凡將相大政議。輒咨孝孺。帝好讀書。每有疑。卽召使講解。乙丑。燕兵入都。孝孺被繫獄。成祖欲使草詔。孝孺大悲慟。聲徹殿陛。成祖降榻勞曰。先生毋自苦。此朕家事。詔天下非先生不可。孝孺投筆於地曰。死卽死。詔不可草。成祖怒。命磔諸市。後福王時。追贈太師。諡文正。

半山寺

半山寺爲宋王安石故宅。寺前雙檜。傳爲安石手植。由縣城東門至鍾山。此爲半道。故名。安石自號半山。嘗於病後捨宅作寺。故蘇軾有一絕句云。甲第非真有。閉花亦偶栽。聊爲清淨供。却對道人開。其前有亭曰半山亭。蘇軾詩

云。登嶺勢魏魏。蓮峯太華齊。凭欄紅日早。回首白雲低。松柏月中老。猿猴物外啼。禪師吟絕後。千古指人迷。

元武湖

元武湖在太平門外。亦稱後湖。湖中有五洲。名曰菱洲、志洲、長洲、新洲、老洲。相傳梁昭明太子種蓮其中。有湖神廟。攬勝樓、陶公亭、諸勝。荷花滿湖。夏景頗佳。

莫愁湖

莫愁湖在三山門外。古名橫塘。相傳南齊時有盧家少婦莫愁家此。故名。有勝棋樓、曾公閣。爲遊人品茗處。湖濱有華嚴庵。卽盧家鬱金香堂遺址。唐沈佺期詩云。盧家少婦鬱金香。海燕雙棲玳瑁梁。李商隱詩云。如何四紀爲天子。不及盧家有莫愁。沈詩言其華富氣象。李詩言其永保富貴。則當時粉黛豪侈。可想而知。勝棋樓在華嚴庵之後。明太祖與徐達對奕處。樓上懸有莫愁

與徐達小像。閨閣美人。竟得與興朝名將。並傳千古。噫。亦奇矣。

秦淮河

秦淮河橫貫城中。爲秦始皇所鑿。斷鍾阜以引淮水。故名。水如碧玉。有文德。利涉淮清。諸橋跨其上。昔時妓院。皆臨秦淮。歌樓畫舫。環集其間。唐杜牧詩。烟籠寒水月籠沙。夜泊秦淮近酒家。商女不知亡國恨。隔江猶唱後庭花。今則秦淮風月。黯然無色。且水色沈黑。濁濁穢惡。實有不堪流連者。然每至夏季。遊人麇集。斜陽西薄。泛舟其中。

桃葉渡

桃葉渡在秦淮河西。晉王獻之有愛妾名桃葉。嘗渡此。獻之作歌送之曰。桃葉復桃葉。渡江不用楫。但渡無所苦。我自來迎接。桃葉亦以歌答之曰。桃葉映紅花。無風自婀娜。春風映何限。感郎獨探我。

雨花臺

雨花臺在聚寶門外。梁武帝時。有雲光法師講經於此。感得天雨賜花。天廚獻食。故名。

三台洞

三台洞在觀音山。面臨長江。上有石。形如飛燕。曰燕子磯。三台洞。卽其坡下之三山也。洞中有一線天。斗大石。石隙有泉水涓滴外流。清涼異常。俗謂人飲此水。可無眼疾。

幕府山

幕府山在神策門外。山周三十里。高七十丈。有五峯相接。晉元帝渡江時。王導建幕府於此。因名。楊循有詩云。倚樓天暝雲如幕。知是瑯琊幕府山。

勾曲山

勾曲山在句容縣東南。本名苗山。亦稱茅山。漢三茅君居此。周百五十里。頗高大。梁陶弘景隱於此。弘景字通明。讀書萬卷。一事不知。以爲深恥。年十歲。

得葛洪神仙傳。晝夜研尋。便有養生之志。曰。仰青天。覩白日。不覺遠矣。齊高帝引爲諸王侍讀。永明十年。脫朝服。掛神武門。上表辭祿。武帝賜束帛。月給茯苓五斤。白蜜二斤。以供服餌。隱居句容之勾曲山第八洞。名曰金壇華陽之天。山中築館。號曰華陶隱居。晚號華陽真逸。又曰華陽真人。性愛松。庭院中徧植之。每聞其響。欣然自樂。有時獨遊泉石。望者以爲神仙。嘗謂人曰。吾見朱門廣廈。雖識其華樂。而無欲往之心。望高巖。瞰大澤。知此難立。至恒自欲就之。築三層樓。自處其上。弟子處其中。賓客處其下。與物違絕。善辟穀。引導之術。年八十五。無病而逝。顏色不變。屈伸如常。香氣累日。氤氳滿山。諡曰貞白先生。初梁武帝徵時。嘗與之遊。及卽位。徵之不出。然遇有大事。帝必使人咨詢。以決可否。時人謂之山中宰相。

青溪九曲

青溪在渡秦淮河之東。三國孫吳時鑿。其東流處。盤迴九曲。清泉縈環。地極

幽勝。可避塵囂。梁昭明太子於流之曲處。鑿之爲池。泛舟其中。嘗曰。何必絲與竹。山水有清音。

景陽井

景陽井在四方城內。城卽臺城故址。一名苑城。周約六里餘。晉咸和中。蘇峻作亂入臺城。卽此。後復於城內建新宮。名建康宮。侯景嘗困梁武帝於此。昔隋克臺城。陳後主與張麗華孔貴妃俱入井。隋軍出之。井欄上有石脈。以帛拭之。現隱紅色。作胭脂痕。故後人亦名爲胭脂井。

黃天蕩

黃天蕩在江寧縣東北四十里。宋韓世忠擊敗兀朮於此。圍其江口。兀朮窘甚。或曰。老鸛河故道。今雖湮塞。若鑿之。可通秦淮。兀朮從之。一夕渠成。凡三十里。兀朮遂自老鸛嘴而遁。

棲霞山

棲霞山在江寧縣東北。山周約四十餘里。高百三十丈。中產藥草。可以攝生。故亦名攝山。上有棲霞寺。南齊僧紹所建。內有唐高宗御撰僧紹碑。書法勁妍。爲高正臣手筆。佛殿北廊。有江總所書碑。禪堂後有千佛巖。巖中鑿石爲佛。數以千百。齊文惠太子及豫章諸王所造。巖上爲明月臺。方廣可布茵席。俯視一石。如錐脫穎。曰紫蓋峯。其陽爲紫蓋洞。風景絕佳。山澗東北有白鹿泉。泉上鐫明臨淮侯李言恭所書古篆。峯北有白雲先生祠。白雲先生者。明逸民張瑤星也。山高險處。爲開天疊浪巖。怪石聳峙。如人立。唐宋人題名。名漫滅不可辨識。巖下有禹碑。楊時喬官金陵時所重刻者也。

邀笛步

邀笛步在青溪橋之右。今上水關。晉王徽之泊舟青溪。望見桓伊。素不相識。使人邀之。曰。聞君善笛。試爲一奏。伊時已貴顯。便下車踞胡床。爲作三調。弄畢卽去。主客不交一言。

謝公礮

謝公礮在半山寺側。今朝天宮卽其故址。相傳晉太傅謝安與右軍王羲之同登此礮。超然有高世之志。宋王安石詩云。我名公字偶相同。我屋公礮在眼中。公去我來礮屬我。不應礮姓尙隨公。

烏衣巷

烏衣巷在江寧城內秦淮河南。晉王導謝安皆居於此。其子弟俱貴顯。世稱爲烏衣郎。唐劉禹錫詩。朱雀橋邊野草花。烏衣巷口夕陽斜。舊時王謝堂前燕。飛入尋常百姓家。

明故宮

明故宮在洪武門內。倚鍾山之麓。宮殿零落。大半燬於兵燹。今僅存九龍橋御溝池殘蹟而已。有方孝孺之血跡碑。以亭覆之。卓立於敗瓦頽垣之中。或曰久而能保其永貞。則神實憑式之矣。

東山

東山一名土山。在縣城東南。謝安營樓館於其上。林竹甚茂。每携青年子姪。往來遊集。唐李白憶東山詩。不向東山久。薔薇幾度花。白雲還自散。明月落誰家。

孫楚酒樓

孫楚酒樓在江寧縣西。孫楚才華藻卓。爽邁不羣。少欲隱居。謂王濟曰。吾欲漱石枕流。濟曰。流非可枕。石非可漱。楚曰。枕流欲洗其耳。漱石欲礪其齒。濟語塞。其雄辯類如此。年四十始參鎮東軍事。性嗜酒。每過酒家飲。盡醉而歸。李白詩。朝沽金陵酒。歌吹孫楚樓。

夢筆驛

夢筆驛在江寧縣東。相傳江淹宿此。嘗夢一美丈夫。自號郭璞。曰。吾有筆在公處。今可見還。淹探懷中。果有五色筆一支。遂授之。自是作詩。絕無佳句。故

世傳江郎才盡。

草堂

草堂在鍾山北。南北朝時。周顒隱此。後顒出仕於宋。爲國子監博士。清貧寡慾。王儉問曰。卿山中何有。顒曰。赤米白鹽。綠葵紫蓼。文惠太子問菜以何味爲最勝。顒曰。春初早韭。秋末晚菘。久之復欲歸隱。孔稚珪作北山移文。假草堂之靈以嘲之曰。鍾山之英。草堂之靈。馳煙驛路。勒移山庭。夫以耿介拔俗之標。瀟灑出塵之想。度白雪以方潔。干青雲而直上。吾方知之矣。若其亭亭物表。皎皎霞外。芥千金而不盼。屣萬乘其如脫。聞鳳吹於洛浦。值新歌於延瀨。固亦有焉。豈期終始參差。蒼黃反覆。淚翟子之悲。慟朱公之哭。乍迴跡以心染。或先貞而後黷。何其謬哉。嗚呼。尙生不存。仲氏既往。山阿寂寥。千載誰賞。世有周子。儂俗之士。旣文旣博。亦元亦史。然而學遁東魯。習隱南郭。竊吹草堂。濫巾北岳。誘我松桂。欺我雲壑。雖假容於江皋。乃纓情於好爵。其始至

也。將欲排巢父。拉許由。傲百氏。蔑王侯。風情張日。霜氣橫秋。或歎幽人長往。或怨王孫不遊。談空空於釋部。覈元元於道流。務光何足比。涓子不能儔。及其鳴騶入谷。鶴書赴隴。形馳魄移。志變神動。爾乃眉軒席次。袂聳筵上。焚芰製而裂荷衣。抗塵容而走俗狀。風雪懷其帶憤。泉石咽而下愴。望林巒而有失。顧草木而如喪。至其紐金章。縮墨綬。跨屬城之雄。冠百里之首。張英風於海甸。馳妙譽於浙右。道帙長擯。法筵久埋。敲扑諠囂。犯其慮。牒訴倥傯。裝其懷。琴歌既斷。酒賦無續。常綢繆於結課。每紛綸於折獄。籠張趙於往圖。駕卓魯於前錄。希蹤三輔豪。馳聲九州牧。使其高霞孤映。明月獨舉。青松落蔭。白雲誰侶。礪戶擢絕無與歸。石徑荒涼徒延佇。至於還颿入幕。寫霧出楹。蕙帳空兮夜鶴怨。山人去兮曉猿驚。昔聞投簪逸海岸。今見解蘭縛塵纓。於是南嶽獻嘲。北隴騰笑。列壑爭譏。攢峯竦諠。慨遊子之我欺。悲無人以赴弔。故其林慚無盡。澗愧不歇。秋桂遣風。春蘿擺月。騁西山之逸議。馳東臯之素謁。今

又促裝下邑。浪樓上京。雖情投於魏闕。或假步於山扃。豈可使芳杜厚顏。薜荔蒙恥。碧嶺再辱。丹崖重滓。塵游躅於蕙路。汚淥池以洗耳。宜扁岫幌。掩雲關。歛輕霧。藏鳴湍。截來轅於谷口。杜妄轡於郊端。於是叢條瞑膽。疊穎怒魄。或飛柯以折輪。乍低枝而掃迹。請迴俗士駕。爲君謝逋客。

太子松

太子松在浦口湯泉之旁。梁昭明太子嘗浴於泉中。泉上二松。爲其手植。或云今已非。

達摩宴坐石

達摩宴坐石在浦口定山。相傳梁時達摩渡江。曾坐石上。掌痕宛然。至今猶約略可認。

一一 揚州

揚州在揚子江之北。運河之西。漢初立劉濞爲吳王都此。後改江都。又改廣

陵。隋始名揚州。地勢西高東下。運河西岸有白馬、寶應、高郵、邵伯諸湖。運河東岸概稱裏下河。東瀕黃海。有廣洋、大縱、吳公、獲金諸湖。窪下多水田。盛產稻米。

小金山

小金山在江都縣北二里許。四面環水。似金山。故名。上有風亭、月觀、吹臺、琴室、湖上草堂。諸勝蹟。清高宗南巡時。賦詩刻石。以亭覆之。名曰御碑亭。

平山堂

平山堂在江都縣城北蜀岡上。宋歐陽修建。堂南向。凡五間。陳設甚精。登堂遙眺。江南金焦北固諸山。皆拱揖檻前。山與堂平。故曰平山。其後爲楠木廳。中有石刻歐陽修像。山麓有法海寺。東西寺牆各嵌巨石。東題淮東第一觀。西題天下第五泉。寺前有康泉。張又新品爲第五。味甘冽。寺後有白塔。塔無層級。無窗戶。上如錐。下如壘。俗名喇嘛塔。昔歐公每攜客堂中。命妓以花傳

客行酒。往往戴月而歸。蘇軾平山堂詩云。高會日陪山簡醉。狂言屢發次公醒。酒如人面天然白。山向吾曹分外青。江上飛雲來北固。檻前修竹憶南屏。六朝興廢餘邱壠。空使奸雄笑寧馨。

文選樓

文選樓在小東門內文樓巷。卽今旌忠寺。梁昭明太子撰文選於樓上。因以爲名。

董井

董井在江都東城鹽運使署內。卽漢江都相董仲舒故宅井也。後人因號曰董井。漢武帝時。仲舒爲江都相。事易王。王爲武帝之兄。好勇素驕。仲舒以禮誼匡正。王敬重焉。

迷樓

迷樓在江都西城。幽房曲室。玉欄珠楯。互相連屬。隋煬帝建。嘗曰。使眞仙遊。

其中亦當自迷。因名。今觀音閣卽其故址。

隋隄

隋隄在江都縣城北。隋大業初。開刊溝入江。渠廣四十步。旁築御道。左右樹以楊柳。北有戲馬臺。其下有路曰玉鈎斜。爲隋煬帝葬宮人處。

二十四橋

二十四橋在江都縣西門外。隋時置。以城門坊市爲名。唐杜牧詩。青山隱隱水迢迢。秋盡江南草未彫。二十四橋明月夜。玉人何處教吹簫。

陳公塘

陳公塘在儀徵縣東北二十里。接江都縣西境。漢陳登爲太守時所築。人號曰愛敬陂。建安初。陳登爲廣陵太守。明賞罰。布威信。海薛賊州之羣。萬有餘戶。束手歸命。未及期年。功化以就。百姓畏而愛之。

騎鶴樓

騎鶴樓在江都縣東北。昔有四人作客於此。各言其志。一願爲揚州刺史。一願積錢十萬。一願騎鶴上昇。一兼言腰纏十萬貫。騎鶴上揚州。於願始足。後人於其地築樓。因名。

賦詩臺

賦詩臺在儀徵縣北。卽今城子山。一名東巡臺。世傳魏文帝嘗立馬賦詩於此。因以名臺。

瓊花臺

瓊花臺在江都縣東門外。蕃釐觀內。花自唐人植。天下獨一株。元時朽。以八仙花補之。

雲山閣

雲山閣在江都縣城南。宋呂公著爲太守時建。落成值中秋。宴客其上。秦觀以舉子入謁。呂素聞其才。請卽席題句。秦觀援筆立就。有末聯云。二十四橋

人望月。台星已在廣寒宮。一座歎賞。

文遊臺

文遊臺在高郵縣東二里。宋蘇軾孫覺秦觀王鞏等載酒論文。同遊於此。李公麟爲圖刻於石。

古香堂

古香堂在興化縣城內。卽今縣立第一高小學校地址。堂前有古梅一。爲宋范仲淹手植。

拱極臺

拱極臺在興化縣北城上。卽元武故址。旁有讀書樓。古名襟淮樓。詹士龍嘗讀書於此。

文峯塔

文峯塔在興化縣東門外。明萬歷二十六年。邑人李思誠建。以少師李春芳

玉帶鎮之。

三 淮安

淮安在揚州之北。地勢南高北下。運河絕淮而南。出清河縣之天妃闌。陡落數十尺。由東南直下。刊溝。水勢平流。淮水則自洪澤湖吐出。灌入運河。自河東岸緣途分泄。其正流則由運入江。洪澤湖有高家堰。所以防湖水。不使之南下者也。其城據淮水之北。俗呼淮城。

鉢池山

鉢池山在山陽縣西北十五里。相傳王子喬煉丹於此。岡阜盤旋。外高中低。故名鉢池。王子喬。周時人。名迥。周靈王太子晉也。好吹笙作鳳鳴。游伊洛之間。道士浮邱生遇之。授以修煉之術。三十餘年後。見鄉人謂曰。可告我家。七月七日。候我於緱氏山巔。至期。果乘白鶴駐山頭。可望不可即。俯首謝父老。數日方去。後立祠緱氏山下。

洪澤湖

洪澤湖在清河縣南六十里。宋神宗熙寧四年所開。引湖水入淮。每當水盛時。有泛溢之患。

袁公路浦

袁公路浦在清河縣西二里。昔袁術自九江東奔袁譚。路出斯浦。術字公路。因以爲名。

金牛岡

金牛岡在山陽縣西北。岡土蒼黃。形似牛臥。昔周世宗伐南唐時。嘗駐軍於岡上。

高家堰

高家堰在洪澤湖之東。長九十里。相傳後漢廣陵守陳登始建。明永樂間。平江伯陳瑄重築。萬歷六年。河督潘季馴修之。今益加固。

劉伶臺

劉伶臺在山陽縣東北七里。前臨淮水。唐許渾詩。劉伶臺下桃花晚。韓信廟前楓葉秋。劉伶字伯倫。放情肆志。常以納宇宙齊萬物爲心。不妄交遊。與阮籍嵇康相善。欣然神解。性尤嗜酒。嘗著酒德頌一篇。仕東晉爲建威將軍。伶嘗携一壺酒。乘鹿車出遊。使人荷鍤隨之。曰。死便埋我。又嘗求酒於妻。妻曰。君飲太過。非攝生之道。伶曰。當誓神斷矣。妻乃買肉具酒以祀神。伶跪祝曰。天生劉伶。以酒爲名。一飲一石。五斗解醒。婦人之言。慎不可聽。祝畢。遂引酒御肉。陶然復醉。伶縱酒放達。或脫衣冠。裸形在屋中。人見而譏之。伶曰。我以天地爲棟宇。塵室爲禪衣。諸君何爲入我禪中。其狂縱多類此。

胯下橋

胯下橋在山陽縣城西。具文街。昔韓信微時。不爲人所重。有淮陰少年侮之。曰。若雖長大。好帶刀劍。中情怯耳。衆隨而和之。少年曰。信能死。刺我。不能死。

出我胯下。於是信熟視之。俯出胯下。一市之人。皆笑信爲怯。

千金亭

千金亭在清河縣東南。韓信貧甚。釣於城下。漂母見信飢而飯之。凡數十日。信曰。吾必有以重報母。母怒曰。大丈夫不能自食。吾哀王孫而進食。豈望報乎。及信既封楚王。召所從食漂母。賜以千金。後人築亭以表之。

四 徐州

徐州在淮安西北。春秋時宋之彭城。西楚霸王項羽都此。其地錯入山東安徽河南三省間。西面山多而高。東面黃河沖積層。坡陀起伏。運河斜貫之。北有微山湖。東包駱馬湖。地勢極佳。當南北水陸之衝。

皇藏峪

皇藏峪在碭山縣南七十里。山深林密。行者欲迷。漢高祖微時。嘗避仇山中。

高祖之字也。

三台山

三台山在宿遷縣北二十里。三峰突聳。勢若連珠。巖石蒼翠。泉林清碧。爲士女游覽處。

白駒山

白駒山在豐縣西南。相傳漢高祖大會父老。宴飲於山中。歌白駒以留賓。因以爲名。

桓山

桓山在銅山縣東北二十七里。亦名魑山。山下有桓魑墓。宋蘇軾遊桓山記云。元豐二年正月己亥晦。春服既成。從二三子遊於泗之上。登桓山。入石室。使道士戴日祥鼓雷氏之琴。操履霜之遺音。曰。噫。嘻。悲夫。此宋司馬桓魑之墓也。或曰。鼓琴於墓禮歟。曰。禮也。季武子之喪。曾點倚其門而歌。仲尼日月

也。而甍以爲可得而毀也。且死爲石椁。三年不成。古之愚人也。余將弔其藏。而其骨毛爪齒。既以化爲飛塵。蕩爲冷風矣。而況於椁乎。況於從死之臣妾。飯含之貝玉乎。使椁而無知也。余雖鼓琴而歌可也。使甍而有知也。聞余鼓琴而歌。知哀樂之不可常。物化之無日也。其愚豈不少瘳乎。二三子喟然而歎。乃歌曰。桓山之上。維石嵯峨兮。司馬之惡。與不磨兮。桓山之下。維水瀾瀾兮。司馬之藏。水皆逝兮。歌畢而去。從遊者八人。畢仲孫舒煥。寇昌朝。王適。王適。王肆。軾之子邁。煥之子彥舉。又有遊桓山詩曰。東郊欲尋春。未見鶯花跡。春風在流水。鳧雁先拍拍。孤帆信溶漾。弄此半篙碧。巖舟桓山下。長嘯理輕策。彈琴石室中。幽響清磔磔。弔彼泉下人。野火失枯腊。悟此人世間。何者爲眞宅。暮回百步洪。散坐洪上石。愧我非王襄。子淵肯見客。臨流吹銅簫。水月照連壁。此歡眞不朽。回首歲月隔。想像斜川遊。作詩寄鼓澤。

箕谷在蕭縣東南。亦名冒山。翹峙衆峯之中。山麓有石。嵌空玲瓏。如太湖石。邑人珍之。

豐西澤

豐西澤在豐縣西。漢高祖爲泗上亭長。嘗被酒夜徑澤中。有大蛇當道。乃前拔劍斬之。俄有老嫗哭曰。吾子白帝子也。今爲赤帝子所殺。哭畢不見。

鄭坡

鄭坡在蕭縣北。昔鄭渾爲沛郡太守。於蕭相二縣。興築坡堰。民頌其德。立石刻曰鄭坡。

妃橋

妃橋在邳縣南。有池號長利。池上有橋。卽張良爲黃石公納履處。徐泗間人呼橋爲妃。張良嘗遊下邳。圯上有一老父衣褐來。墮履圯下。顧謂良曰。孺子下取履。良愕然。忍而下取。老父曰。履我。良長跪履之。老父曰。孺子可教。後五

日平明與我會。此及期良往。老父出一編書授之。曰。讀此則爲王者師矣。後十年興。十三年。孺子見我濟北穀城山下黃石。卽我也。唐李白經下邳圯橋。懷張字房詩云。子房未虎嘯。破產不爲家。滄海得壯士。椎秦博良沙。報韓雖不成。天地皆震動。潛匿遊下邳。豈曰非智勇。我來圯橋上。懷古欽英風。惟見碧流水。曾無黃石公。歎息此人去。蕭條徐泗空。

戲馬臺

戲馬臺在銅山縣城南。西楚項羽因山築臺。以觀戲馬。因名。宋武帝嘗於九日登之。置酒賦詩。至今相沿成俗。宋蘇軾與客同遊戲馬臺。書西軒壁七律二首。其一云。古寺長廊院院行。此軒偏慰旅人情。楚山西斷如迎客。汴水南來故遶城。路失玉鈎芳草合。林亡白鶴古泉清。淡游何以悟庠老。坐聽郊原琢磬聲。其二云。竹杖芒鞋取次行。下臨官道見人情。天寒菽粟猶棲畝。日暮牛羊自入城。沽酒獨教陶令醉。題詩誰似皎公清。更尋陋巷顏夫子。乞取微

言繼此聲。

黃樓

黃樓在銅山縣東城上。卽今東門樓。宋蘇軾爲太守時建。落成時。適其友王鞏過訪。乃約衆客。棹小舟。遊泗水。北上聖女山。南下百步洪。吹笛飲酒。乘月而歸。軾以事不得往。夜著羽衣。佇立於黃樓以待之。謂鞏曰。李太白死。世間無此樂。三百餘年矣。曾作觀月黃樓席上次韻詩云。中秋天氣未應殊。不用紅紗隔座隅。山上白雲橫匹素。水中明月臥浮圖。未成短棹還三峽。已約輕舟泛五湖。爲問登臨好風景。明年還憶使君無。

歌風臺

歌風臺在沛縣東南一里。故沛宮內。漢高祖過沛。置酒沛宮。召故人父老子弟。相與縱酒。酒酣。高祖擊筑歌曰。大風起兮雲飛揚。威加海內兮歸故鄉。安得猛士兮守四方。

放鶴亭

放鶴亭在銅山縣南雲龍山。宋熙寧間。張天驥隱於雲龍山之麓。自號雲龍山人。山人有二鶴。朝放暮歸。皆在亭中。蘇軾爲之作放鶴亭記。云熙寧十年秋。彭城大水。雲龍山人張君之草堂。水及其半扉。明年春水落。遷於故居之東。東山之麓。升高而望。得異境焉。作亭於其上。彭城之山。岡嶺四合。隱然如大環。獨缺其西一面。而山人之亭。適當其缺。春夏之交。草木際天。秋冬雪月。千里一色。風雨晦明之間。俯仰百變。山人有二鶴。甚馴而善飛。旦則望西山之缺而放焉。縱其所如。或立於陂田。或翔於雲表。暮則僦東山而歸。故名之曰放鶴亭。郡守蘇軾。時從賓佐僚吏。往見山人。飲酒於斯亭而樂之。搥山人而告之曰。子知隱居之樂乎。雖南面之君。未可與易也。易曰。鳴鶴在陰。其子和之。詩曰。鶴鳴於九皋。聲聞於天。蓋其爲物清遠閒放。超然於塵埃之外。故易詩人以比賢人君子。隱德之士。狎而玩之。宜若有益而無損者。然衛懿公

好鶴則亡其國。周公作酒誥。衛武公作抑戒。以爲荒惑敗亂。無若酒者。而劉伶阮籍之徒。以此全其真。而名後世。嗟夫。南面之君。雖清遠閒放。如鶴者。猶不得好好之則亡其國。而山林遯世之士。雖荒惑敗亂。如酒者。猶不能爲害。而況於鶴乎。由此觀之。其爲樂。未可以同日而語也。山人欣然而笑曰。有是哉。乃作放鶴招鶴之歌曰。鶴飛去兮。西山之缺。高翔而下。覽兮。擇所適。翻然歛翼。宛將集兮。忽何所見。矯然而復擊。獨終日於澗谷之間兮。啄蒼苔而履白石。鶴歸來兮。東山之陰。其下有人兮。黃冠草履。葛衣而鼓琴。躬耕而食兮。其餘以汝飽。歸來歸來兮。西山不可以久留。又登雲龍山詩云。醉中走上黃茆岡。滿岡亂石如羣羊。岡頭醉倒石作牀。仰看白雲天茫茫。歌聲落谷秋風長。路人舉首東南望。拍手大笑使君狂。訪張山人五律二首。其一云。魚龍隨水落。猿鶴喜君還。舊隱邱墟外。新堂紫翠間。野麋馴杖履。幽桂出榛菅。洒掃門前路。山公亦愛山。其二云。萬木鑽雲龍。天留與戴公。路迷山向背。人在灑

西東。薺麥餘春雪。櫻桃落晚風。入城都不記。歸路醉眠中。又遊張山人園詩云。壁間一軸烟蘿子。盆裏千枝錦被堆。慣與先生爲酒伴。不嫌刺史亦顏開。纖纖入麥黃花亂。颯颯催詩白雨來。聞道君家好井水。歸軒乞得滿瓶回。

朱陳村

朱陳村在豐縣東南。唐白居易詩。徐州古豐縣。有村曰朱陳。一村惟兩姓。世世爲婚姻。

逍遙堂

逍遙堂在銅山縣城內。舊府署後。蘇軾與弟轍嘗宿此。轍詩云。逍遙堂後千尋木。常送中宵風雨聲。

萃墨亭

萃墨亭在銅山縣城外百步洪上。宋蘇軾嘗與雲龍山人張天驥。詩僧道潛。賦詩題石。

燕子樓

燕子樓在銅山縣城內北隅。爲唐張尙書舊第。白居易詩序云。徐州故尙書張有愛妓曰盼盼。善歌舞。雅多風態。尙書旣沒。歸葬東洛。而彭城有張氏舊第。第中有小樓。名曰燕子。盼盼念舊愛而不嫁。居是樓中十餘年。塊然幽獨。不改其初。

五 海州

海州今改爲東海縣。在淮安之北。地瀕於黃海之曲。北高南下。東北有鶯遊山。西南有青伊碩濩諸湖。卽周禮所謂青州之寢。流水所瀦也。南通於淮。北通於桑墟湖。

萬花崖

萬花崖卽石棚山北嶺。有巨石覆巖上。其形如棚。嶺甚高峻。了無花木。宋石延年判海州。使人以泥裹桃核爲彈。擲於其上。數年之間。花發滿山。爛若錦。

繡。因名萬花崖。

羽山

羽山在東海縣西北。卽禹貢所謂羽畎夏翟是也。昔虞舜殛鯀於羽山。卽爲此處。

孔望山

孔望山東海縣西南一百餘里。與郟城相近。相傳孔子問官於郟子。嘗登此山以望海。

鬱林島

鬱林島在東海縣東北。俗名雲臺山。卽山海經所謂郁州是也。今島上有樹藝公司。

望海樓

望海樓在東海縣城上。登樓可望滄溟。宋張耒詩。城外滄波日夜流。城南山

色對城樓。

孝婦祠

孝婦祠在東海縣東北三十三里。相傳漢時大旱。太守殺牛祭孝婦冢。乃大雨。因立祠。

六 蘇州

蘇州爲春秋時吳國之都。秦會稽郡。後爲吳郡。漢荆王劉賈都此。隋改蘇州。城周四十五里。凡六門。據太湖之東。地勢坦平。運河環城一周。澱山湖、泖湖、居其東南。陽城湖、昆城湖、尙湖、位於其北。白蜆江、新陽江、福山港等交絡於其間。

虎邱

虎邱在吳縣城西北七里。一名虎阜。又名海湧峰。吳王闔廬葬此。下有劍池。相傳爲吳王試劍處。旁有摩崖顏魯公書虎邱劍池四大字。又有千人石、白

蓮池。悠悠泉。頑石點頭石。五十三穿諸勝。其巔有虎邱寺。寺後爲處邱塔。宋蘇軾遊虎邱寺詩云。入門無平田。石路細穿嶺。陰風生澗壑。古木翳潭井。湛盧誰復見。秋水光耿耿。鐵花繡巖壁。殺氣噤蛙黽。幽幽生公堂。左右立頑礦。當年或未信。異類服精猛。胡爲百歲後。仙鬼互馳騁。窈然留清詩。讀者爲悲哽。東軒有佳致。雲水麗千頃。熙熙覽生物。春意破淒冷。我來屬無事。煖日相與永。喜鵲翻初日。愁鳶蹲落景。坐見漁樵還。新月溪上影。悟彼良自哈。歸田行可請。

鄧尉山

鄧尉山在吳縣城西南六十里。漢鄧尉隱此。故名。梅樹成林。春初多遊人。向有鄧尉探梅之稱。東南連玄墓山。其巔有聖恩寺。寺旁古松四。皆數千年物。世人以清奇古怪名之。

天平山

天平山在吳縣城西南二十五里。宋范仲淹葬此。故又曰范墳。奇石林立。曰萬笏朝天。上有蓮花洞、白雲洞、飛來峰、諸勝。又有蟾蜍、龍頭、靈龜、釣魚等石。奇跡異狀。允推吳中各山之冠。

靈巖山

靈巖山在吳縣西三十里。高三百六十一丈。吳王館娃宮故址在焉。山中多產石。可爲硯。故亦名硯石山。有石鼓、石鼉、石馬、奇形怪狀。萬變千化。有浣花石、上方石、洗硯石、浣月石、醉僧石、壽星石、披雲石、望月石、袈裟石、槎頭石、獻花石、藏經石等名。尤以靈芝石爲最勝。山之絕頂爲琴臺。范成大所謂下瞰太湖及洞庭兩峰。滴翠叢碧。如在白銀世界中是也。臺東有浣花池。吳宮女浣花於此。山前十里有采香徑。吳美人采香處。山西南有巖。曰佛日巖。石壁峭拔。其中平坦處有塔。曰靈巖塔。塔前有寺。曰靈巖寺。寺西北有西施洞。相傳西施嘗避暑其中。云登山一望。遠峰拱翠。矮樹鋪青。茅舍平疇。如在塵外。

洵佳景也。

太湖

太湖卽古震澤。又有笠澤五湖等名。周六百八十餘里。湖中列嶼六七。東西二洞庭最著。其上民家多果園。四時丹苞朱實。兼以水石之勝。爲一幅天然圖畫。好奇者稱爲洞天福地焉。唐白居易泛太湖書事寄微之詩云。煙渚雲帆處處通。飄然人似入虛空。玉杯淺酌迎初匝。金管徐吟曲未終。黃夾纈林寒有葉。碧琉璃水淨無風。避旗飛鷺翩翻白。驚鼓跳魚潑刺紅。澗雪壓多松偃蹇。巖泉滴久石玲瓏。書爲故事留湖上。吟作新詩寄浙東。軍府威容從道盛。江山氣色定知同。報君一事應君羨。五宿澄波浩蕩中。

尙湖

尙湖在常熟縣西南四里。湖旁有山巖映帶。頗爲奇勝。相傳太公尙嘗釣於此。故名。

虞山

虞山跨常熟縣西城。一名海虞山。相傳虞仲隱此。山脊有拂水巖。下臨山阿。崖壁削拔。水落兩石間。微風激之。濺灑霏霏。

辛峯亭

虞山在城內有辛峯亭。四面封閉。不可出入。西爲乾天宮。下爲石梅塢。遊人咸集於此。

昭明讀書臺

讀書臺在乾元宮之西。相傳梁昭明太子讀書處。其上有亭。壁間有石刻昭明太子像。

言子墓

言子墓在辛峯之麓。規制宏整。有二坊分列內外。外題曰道啟東南。內題曰南方夫子。

虞仲墓

虞仲墓在辛峯之東。前有石坊。題先賢虞仲墓。又有石碑。題商逸民虞仲周公之墓。

雅集亭

雅集亭據辛峯之腰。額題雅集亭三字。內刻雅集圖。紀載文字。爲沈石田先生觴詠處。

小三台

小三台在城內虞山南麓。地多巖石。具崇危錯落之致。有二石甚巨。上鐫小三台三字。

興福寺

興福寺在辛峯之西。古稱破山寺。門外石橋臥空。豐林擁翠。遊人至此。頗得怡情悅目。唐常建破山寺詩云。清晨入古寺。初日照高林。曲徑通幽處。禪房

花木深。山光悅鳥性。潭影空人心。萬籟此俱寂。惟聞鐘磬音。

君子泉

君子泉在興福寺內。印心石屋之下。泉水甚淺。清碧可鑑。終歲不涸。壁鐫君子泉三字。

印心石屋

印心石屋在興福寺內。竹林掩映間。圓窗白壁。陰露其隙。後負山巖。俯瞰君子泉。山青水碧。地頗幽勝。

清涼禪寺

清涼禪寺在興福寺西。一名三峯寺。其間森林叢莽。寺舍規模宏偉。門外遠望。滿目皆松。卽北山松林。

拂水禪院

拂水禪院在虞山錦峯西南。俗稱爲報恩寺。門外有石橋。橫跨山澗。每逢雨

後澗水經流橋下。巖石嶙峋。懸爲瀑布。風自南來。則倒捲而上。如萬斛珠蕊。凌空飄揚。頗稱奇觀。

劍門

劍門在虞山之陽。雄奇秀麗。爲全山之冠。崖立如削。故借蜀道劍門以名之。石壁上鐫劍門二字。頗清晰。其旁一角。巨石擁翠。奇特外扑。石鐫煙嵐高曠四字。爲清康熙御筆。

石屋洞

石屋洞爲巨石疊成平面。下有洞。故名。方廣丈許。相傳爲太公呂望避紂隱居之處。

桃源澗

桃源澗在石屋洞之西。細草叢叢。亂石齒齒。泉自石隙出。注爲澗。每逢大雨。卽成瀑布。

望海墩

望海墩爲虞山最高處。瞭望東海。雲山飄渺。其巔有石柱並列。相傳有齊女墓在其下。

小石洞

小石洞在小雲棲寺。一名松泉。洞高約三丈。廣約二丈許。內有露珠泉。水點下滴有聲。

老石洞

老石洞泉水甚淺。清瑩澈底。洞口有叢樹庇蔭。繁枝濃葉間。但聞泉聲涓涓。景殊幽勝。

胥山

胥山在吳縣西南太湖左岸。伍子胥盡諫而死。吳人憐其忠。爲立祠於山上。名曰胥山。

滄浪亭

滄浪在吳縣城內三元坊。又名五百名賢祠。相傳爲吳越廣陵王元璩池館。宋蘇舜欽居之。買石以築亭。

樂圃

樂圃在吳縣城內。宋朱長文故居。高岡清池。喬松古檜。饒有勝致。卽吳越廣陵王金谷園舊址。

南園

南園在吳縣城內府學旁。宋王禹偁爲縣令時。嘗携客醉飲於此。有他年我若功成後。乞與南園作醉鄉之句。

赤松子煉丹臺

臺在吳縣西南六十里穹隆山上。相傳赤松子嘗采藥煉丹於此。山有昇仙臺及極大寺觀。

生公說法臺

說法臺在虎邱山上。昔有僧竺道生講法於此。聚石爲徒。與談至理。石皆爲之點頭。

響屨廊

響屨廊在吳縣西靈巖山。山有靈巖塔。其西南有小斜廊。卽其遺址。昔吳王建長廊。迴環曲折。雕欄畫楯。以榿梓藉地。空虛其下。令西施步屨繞之。蓮花細細。清脆可聽。

桃花隴

桃花隴在吳縣閶門內。宋時章氏別業。明唐寅於其地築桃花庵。中有夢墨亭。景絕幽。

寶帶橋

寶帶橋在吳縣西南。跨澹臺湖。南北長約三十餘丈。唐王仲舒捐玉帶築此。

因以爲名。

錦帆涇

錦帆涇在吳縣盤門內。相傳吳王掛錦帆泛舟游此。沈歸愚詩。一派歌聲何處起。採蓮人在錦帆涇。

館娃宮

館娃宮在吳縣西南靈巖山上。吳王張女樂處。山頂有靈巖寺。卽吳館娃宮遺址。

獅子林

獅子林在吳縣城內東北隅。元至正二年建。多奇石。狀類狻猊。故名。內有元倪雲林手堆石。及臥雲堂。立雪堂。問梅閣。指柏軒。禪窟。竹谷諸勝。寺額爲清康熙御書獅子寺三字。

陸龜蒙宅

陸龜蒙宅在吳縣城內臨頓里。門有巨石。爲其遠祖績爲鬱林太守時携歸。號鬱林石。

寒山寺

寒山寺在吳縣西十里楓橋旁。唐張繼夜泊楓橋詩云。月落烏啼霜滿天。江楓漁火對愁眠。姑蘇城外寒山寺。夜半鐘聲到客船。

元妙觀

元妙觀在吳縣城內觀前街。晉咸寧中建。號眞慶道院。唐改爲開元宮。宋祥符中。更名天慶觀。至元元年。改今名。有殿宇三四十處。香火極盛。每至春時。遊人多集於此。

五人墓

五人墓在虎邱山塘。爲明代吳中義士。顏佩章、馬傑、楊念如、沈揚、周文元。合葬之處。明萬歷間。周順昌以忤魏忠賢被逮。顏佩章等五人激於義憤。噪逐

緹騎巡撫毛一鷺捕而斬之。吳默、文震孟、姚希孟爲之立墓。

要離墓

要離墓在閶門內。吳公子光既刺王僚，卽王位，憂其子慶忌在鄰國，問計於伍子胥。子胥以要離進。離謂吳王曰：「吾詐負罪出奔，王殺吾妻子，且出怨言，則可見信於慶忌。」光乃戮其妻子於市，以怨言聞於諸侯。離往見慶忌，涕泣獻計，共報此仇。慶忌果信而喜之，相與渡江，行至吳地，乃投慶忌於水。三淬其頭，慶忌顧左右曰：「莫殺之，令還吳，以旌其忠。」離卒伏劍而死。漢梁鴻寓皋伯通下，臨卒謂主人曰：「幸葬我要離塚旁。」今閶門內法會庵西有古塚二，卽是。

貞娘墓

貞娘墓在虎邱山上虎邱寺側。貞娘爲吳國之佳人，卒葬於此。後人過其地者，慕其華麗，相競賦詩，題於墓旁樹上。有譚銖者書一絕云：「虎邱山下冢纍纍。」

纍松柏蕭條盡可悲。何事人世惟重色。貞娘墓上獨留詩。

七 松江

松江在蘇州東南。吳封陸遜爲華亭侯於此。故亦名華亭。東瀕東海。南臨錢塘灣。地勢坦平。黃浦江合蘇州河東北流。由吳淞口會揚子江水入海。滬杭甬鐵路經過其間。

機山

機山在華亭縣西北四十里。爲九峯之一。山下有村曰平原。因晉陸機曾爲平原內史。故山與村以名。

橫雲山

橫雲山在華亭縣西北二十五里。其巔有白龍洞。深不可測。其東爲小橫雲山。峯巒峭立。色似頰。俗呼爲小赤壁。

瑁湖

瑁湖在婁縣城內西南隅。一名陸瑁池。相傳爲陸瑁養魚之所。宋時爲放生池。

五色泉

五色泉在華亭縣西南。相傳諸葛洪嘗煉丹湖上。丹成投之水中。故其泉常湧成五色。

折桂閣

折桂閣在華亭縣治。宋李夔以右文殿修撰謫華。生子綱於此。爲中興名相。故亦名相公閣。

二陸草堂

二陸草堂在華亭縣城中普照寺內。相傳爲陸機陸雲兄弟讀書處。其旁有梅花古井。陸機字士衡。身長七尺。聲如洪鐘。少有異才。文章冠世。其弟雲字士龍。六歲能屬文。性清正。有才理。與機齊名。雖文章不及機。而持論過之。時

人稱之曰二陸。後爲孟玖等所譖。兄弟俱遇害。機臨死嘆曰。華亭鶴唳。可復聞乎。是日昏霧晝合。大風折木。平地大雪。時以爲陸氏之寃。

顧亭林宅

顧亭林宅在華亭縣東南亭林鎮。地有高邱。顧野王於此修輿地志。時呼野王讀書堆。其北有湖。湖南有林。因呼顧亭湖。今爲寶雲寺。有沼深黑。云是野王墨池。寺左有野王祠。

居竹書屋

居竹書屋在青浦縣城內。爲元曹和甫故宅。方回作記。趙孟頫書。今其碑在府學內。

白石山寮

白石山寮在青浦縣東余山上。山中舊爲余姓者修道之所。明陳繼儒曾棲隱於此。

白燕巢墓

白燕巢墓在華亭縣東門外。元時袁凱在楊維禎座上。賦白燕詩。擅場。人呼爲袁白燕。

八 上海

上海本華亭縣五鄉之地。元時置令。始別爲上海一邑。清道光十九年鴉片戰爭起。二十二年。白門條約成。開港通商。上海遂爲五口之一。商務繁盛。爲吾國第一商埠。

黃浦

黃浦在上海縣東。卽古之東江。楚春申君黃歇鑿其傍支流。後與江合。故亦稱爲春申浦。

藏書樓

藏書樓有四。一、圖書館。二、格致書院。三、天主堂。四、博物院。所藏書籍甚富。入

閱有定時。

博物院

博物院有二。一在徐家匯天主堂。一在博物院路五號。內有奇禽怪獸。爲不常見之物。

天文臺

天文臺在徐家匯。創於清同治十一年。光緒二十七年。復建新臺於舊臺之西。卽今之觀象臺。臺中儀器。如賽基機、風雨表、窺星鏡、記風機、地震儀、測雲器、測雨器等。靡不俱備。

愚園

愚園在靜安寺路西。與靜安寺相近。內有如舫亭、敦雅堂、花神閣、飛雲樓等。風景絕佳。

雙清別墅

雙清別墅在康腦脫路。俗呼徐園。入門竹林葱鬱。軒亭精潔。累石爲假山。山上張風車。風來車動。有吸水機則吸水上升。復注入池中之噴水機。水由此機噴出。高可丈許。

愛儷園

愛儷園在靜安寺路相近之哈同路。俗呼哈同花園。爲英籍猶太人哈同及其婦羅迦陵所築。地廣三百畝。亭臺池石。備極壯麗。並參以佛寺之式。人遊其中。如行山陰道上。

半淞園

半淞園在高昌廟路。門上橫額。爲江天攬勝四字。廊壁間徧黏快雪堂帖。有一門題曰又一村。門內有山。上有亭。可望黃浦。旁有杏花村酒店。坐而沽飲。頗極看山觀水之樂。

六三園

六三園在寶山路北。乃日商六三亭主人所構。一切建築。日本式爲多。水木清華。亭榭幽勝。櫻花甚繁。來自日本。花具紅綠白三色。陰歷三月間盛開。望之若雲霞。誠大觀也。

東園

東園在城中邑廟內。卽內園。有大假山。有老栝一株。相傳爲明時物。俗呼爲白皮松。

西園

西園亦在邑廟內。爲明潘允庵豫園舊址。有香雪堂、三穗堂、萃秀堂、點春堂、諸勝。

華人公園

園在裏擺渡橋畔。面臨蘇州河。園內雜蒔花木。中央爲日晷亭。左右有茅亭四。極樸質。

西人公園

園在外擺渡橋畔。面臨黃浦。樹木頗多。中有音樂亭及噴水池。左右有茅亭各一。

新公園

新公園在北四川路靶子場。地頗廣闊。花木繁植。內有球場。夏時西人多遊集於此。

兒童公園

園在虹口蓬路。俗名崑山花園。西隅有一小屋。內張電氣風扇。爲兒童納涼之用。

龍華寺

龍華寺在上海縣西十八里。地名龍華鎮。寺爲古剎。建於唐垂拱年間。寺前夾道種柳。柳外皆桃樹。蓋鄉人多以種桃爲業。當桃花盛開時。士女傾巷出

遊頗極一時之盛。

第六泉

第六泉在靜安寺路靜安寺門前。泉含琉璜質。護以石欄。井旁石上鑄天下第六泉五字。

綠雲洞

綠雲洞在靜安寺內。洞口常有雲氣擁護。相傳爲元僧壽寧棲息之所。今已不可考。

龍華塔

龍華塔在龍華鎮龍華寺前。孤高兀立。今已大半傾圮。相傳爲三國吳大帝時所建。

龍井

龍井在龍華寺前。并有二。其泉一清一濁。清者人皆取飲。濁者不可飲。含有

琉璃質。

玉玲瓏

玉玲瓏在邑廟西園香雪堂前。堂燬於洪楊之役。惟此石獨存。相傳爲宋花石綱遺物。

古鳴鶴橋

古鳴鶴橋在北橋鎮。卽今之北橋。相傳晉陸機曾放鶴於橋上。後人遂名其橋曰鳴鶴。

瓶山

瓶山在北橋鎮。相傳晉袁崧犒軍於此。酒罄聚瓶爲山。故名。今山猶存畝許。高尋丈。

黃歇渡

黃歇渡在北亭鄉。俗呼爲黃渡。相傳楚春申君嘗於此渡江。因名。江濱舊有

亭。今已廢。

九 太倉

太倉在蘇州東。元時朱瑄等議海運。置倉於此。故名。元時海運。由此入海。城市繁華。

寶山

寶山在寶山縣南。當吳淞口東岸。明永樂十年。平江伯陳瑄以海中運道莫定。將土築山。爲往來之表識。立碑於山上。文曰。相地之宜。築土山以爲往來之望。樹以嘉木花竹。蔚然奇觀。民稱之曰寶山。

東園

東園在太倉縣東門外。相傳爲明王錫爵築。其園中水石亭榭。皆一時名流所布置。

弇山園

弇山園在太倉縣隆福寺西。明王世貞築。中疊三峯。曰上弇、中弇、下弇。極園亭林木之勝。

春水船

春水船在太倉縣城內武陵橋下。元咸陽教諭殷奎讀書處。奎有詩云：江南何處憶當先。先憶我家春水船。有酒有花重慶日。無風無雨太平年。

樂隱園

樂隱園在太倉縣北沙頭鎮團溪之上。爲元瞿逢祥隱居之所。楊維禎爲之作記。

畏壘亭

畏壘亭在嘉定縣西南。地名安亭鎮。接崑山縣界。明歸有光嘗讀書其中。自爲之記。其文云：自崑山城水行七十里曰安亭。在吳淞江之旁。蓋圖志有安亭江。今不可見矣。土薄而俗澆。縣人爭棄之。吾妻之家在焉。余獨愛其室中。

間覩。壬寅之歲。讀書於此。宅西有清池。古木。壘石爲山。山有亭。登之隱隱見吳淞江環繞而東。風帆時過於荒墟樹杪之間。華亭九峯。青龍鎮古剎浮圖。皆直其前。亭舊無名。余始名之曰畏壘。莊子稱庚桑楚得老聃之道。居畏壘之山。其臣之畫然知者去之。其妾之挈然仁者遠之。擁腫之與居。鞅掌之爲使。三年。畏壘大熟。畏壘之民。尸而祝之。社而稷之。而余居於此。竟日閉戶。二三子或有自遠而至者。相與嘔吟於荆棘之中。余妻治田四十畝。值歲大旱。用牛挽車。晝夜灌水。頗以得穀。釀酒數石。寒風慘慄。木葉黃落。呼兒酌酒。登亭而嘯。忻忻然誰遠我而去我者乎。誰與吾居而吾使者乎。誰欲尸祝而社稷我者乎。作畏壘亭記。

十 常州

常州在蘇州之西。地勢坦平。惟西南有山。北帶揚子江。南面太湖。運河西北自鎮江府來。繞城而東南流。入蘇州府。河之東岸。有孟瀆申港等支流。通於

揚子江故田土肥沃。

惠山

惠山在無錫縣西門外五里許。一名慧山。西域僧慧照居之。因名。亦名九龍山。山陽有九陽。若龍偃臥。山周四十里。高百餘丈。登其巔。可望太湖。天光雲影。吞吐大荒。上有惠山寺。卽歷山草堂故址。荒碑斷碣。長埋於豐林蔓草間。多模糊不可識矣。宋蘇遊惠山賦五古三首。其一云。夢裏五年過。覺來兩鬢蒼。還將塵土足。一步漪瀾堂。俯窺松桂影。仰見鴻鶴翔。炯然肝肺間。已作冰玉光。虛明中有色。清淨自生香。還從世俗去。永與世俗忘。其二云。浮雲不遮山。疎雨不濕人。蕭蕭松徑滑。策策芒鞋新。嘉我二三子。皎然無淄磷。勝遊豈殊昔。清句仍絕塵。弔古泣舊史。疾讒歌小旻。哀哉扶風子。難與巢父隣。其三云。敲火發山泉。烹茶避林樾。明窗傾紫盞。色味兩奇絕。吾生眠食耳。一飽萬想滅。頗笑玉川子。饑弄三百月。豈如山中人。睡起山花發。一甌誰與共。門外

無來轍。又有惠山謁錢道人烹小龍團登絕頂望太湖詩。踏遍江南南岸山。逢山未免更流連。獨携天上小團月。來試人間第二泉。石路縈回九龍脊。水光翻動五湖天。孫登無語空歸去。半嶺松聲萬壑傳。

天下第二泉

第二泉在惠山漪瀾堂後。一名陸子泉。泉分三池。上池味最甘。唐陸羽評爲天下第二。中池味澀。下池在漪瀾堂前。其水由暗渠經螭吻注於池。池右有石刻元趙孟頫書天下第二泉字。又有清高宗御碑。

石門

石門在惠山望公隴。有峭壁高五六丈。望之若城。飛瀑四濺。劃開一線。兩門翼然。

頭茆峯

頭茆峯爲白石隴與桃花隴之頂。白石隴泉水甘冽。遊人叢集。桃花隴下有

女媧氏廟。

二茆峯

二茆峯爲王家陽與宋陽之頂。宋陽列石奇異。有鏡光石。獅子石。天公石。跡石等奇蹟。

三茆峯

三茆峯爲望公陽與仙人陽之頂。爲惠泉山最高之處。絕頂左右。巨石峭立。高約數丈。

竹爐山房

竹爐山房在第二泉之左。因古時有以竹爐烹茶得名。山房中有鄉賢王孟端先生畫竹石刻。西爲寶翰閣。右有雲起樓。下有羅漢泉。爲惠山名勝之冠。

春申澗

春申澗在惠山泉亭術。相傳爲楚黃歇放馬之處。俗呼爲黃公澗。每逢大雨

之後。澗水狂瀉。卽成瀑布。世稱爲黃公瀑布。山半臨澗之中流。有巨石一方。其上刻臥雲二字。爲明邵文莊公寶手書。

金蓮池

金蓮池在昭忠祠內。池有金蓮花。爲無錫特產。上有聽松石。唐李陽冰篆書聽松二字。

寄暢園

寄暢園在惠山之麓。明正德中秦端敏公所建。引澗泉作池。聲如風雨。清聖祖高宗南巡。皆駐蹕於此。內有池沼及假山奇石。景絕幽雅。

梅園

梅園在無錫縣西門外十三里。綠林成陰。中多梅樹。登其高處。太湖、五里湖皆在目前。

五里湖

五里湖在無錫縣西門外十里。爲太湖之內湖。與太湖相通處。兩山東爲一口。山影波光。風景絕佳。湖濱有高子水居。爲明高攀龍故宅。高攀龍字存之。少讀書。輒有志程朱之學。操履篤實。涵養粹然。以靜爲主。一出於正。爲當代大儒。與顧憲成修復東林書院。講學其中。憲成卒。攀龍專講席。海內士大夫。識與不識。稱顧高無異詞。舉萬歷間進士。累官刑部右侍郎。後以忤魏忠賢。削籍。未幾。忠賢誣以他事。遣緹騎往逮。高公拜書遺表。自沈於池而死。聞者莫不傷之。崇禎初。贈太子少保。諡忠憲。

至德祠

至德祠在惠山之旁。內祀吳泰伯。每歲春時。內設茶座。泡煮極精。爲遊人品茗之處。

東坡石

東坡石在武進縣城內東獅子巷關帝廟後。有大石一方。相傳爲蘇東坡卜

居時遺跡。

萬壽亭

萬壽亭在武進縣東門外文成壩。相傳爲蘇東坡艤舟亭舊址。夏季居人多納涼於此。

文筆塔

文筆塔在武進縣大平寺前。高七級。上尖銳。形如筆。吳大帝時建。清光緒間重修之。

陶園

陶園在武進縣小南門外。相傳爲明唐順之讀書處。有孫愼行碑題。其旁有唐順之墓。順之字應德。生有異稟。稍長。洽貫羣籍。舉嘉靖八年進士。以郎中視師浙江。與胡宗憲協謀討賊。順之以禦賊上策。當截之海外。乃躬泛海。自江陰抵蛟門大洋。一晝夜行六七百里。從者皆驚嘔。順之意氣自如。遇賊於

崇明三沙。督舟師邀擊之。斬馘一百二十。沈舟十三。官至右僉都御史。順之於學無所不窺。大則天文樂律地理兵法。小則弧矢勾股。壬奇等術。皆窮其深奧。所作文章。駸駸樸古。汪洋紆爛。卓然大家。

黃山

黃山在江陰縣東北。上有席帽峯。下有郭景純故宅。有巨石兀立。俯漱江濤。奇險清絕。

善卷洞

善卷洞在宜興縣國山東南。卽祝英臺故宅。洞內可容千人。中有立石。高丈餘。號玉柱。

梅花隴

梅花隴在宜興縣東南三十六里。唐陸希聲詩。凍蕊凝香雪艷新。小山深隴伴幽人。卽此。

九曲亭

九曲亭在無錫縣慧山寺前。其水九曲。中有方池。一名浣沼。宋縣令蘇舜欽流觴於此。

伯牙琴臺

伯牙琴臺在武進縣伯牙瀆。相傳伯牙於此鼓琴。棄琴瀆中。瀆產琴魚。絃徽悉備。

任公釣臺

任公釣臺在宜興縣北。前臨荆溪。相傳任昉守郡時。嘗遊釣於此。并賦詩以誌其樂。

吳季札墓

季札墓在江陰縣西二十五里。申浦之南。昔孔子題其碑曰。嗚呼有吳延陵季子之墓。

十一 鎮江

鎮江在常州之西。其地西南多山。就中茅山最高大。東北坡陀起伏。中包長蕩湖。揚子江經其北。運河引江水斜貫其間。其城瀕於揚子江與運河會口。漚寧鐵路通過之。

金山

金山在丹徒縣西門外五里許。一名浮玉山。以山在江中。風濤震撼。勢欲飛動。故曰浮玉。又名獲符山。相傳晉破符堅。獻俘於山下。因名山。舊在江中。嗣因南岸沙漲。漸與山連。今可步登。山上有澤心寺。宋祥符中。改金山曰游龍山。因名寺曰游龍寺。清康熙間。改稱江天寺。興工修築。煥然一新。殿宇壯麗。金碧輝煌。大殿之旁。有閣曰留玉。中藏蘇東坡玉帶。共十六片半。其巔有慈壽塔。凡七級。塔北有碑。覆之以亭。鐫清乾隆御書江天一覽四字。妙高臺遺址在焉。全山樓閣參差。檻櫺櫺比。自下望之。但見紅牆碧瓦。出沒雲烟。故諺

有金山寺裏山之語。然登山一望。江流滾滾。開拓心胸。南北青山。盡赴眼底。古人所謂攬數州之秀。於俯仰之間。洵非虛語也。蘇軾金山妙高臺詩云。我欲乘飛車。東訪赤城子。蓬萊不可到。弱水三萬里。不如金山去。清風半帆耳。中有妙高臺。雲峯自孤起。仰觀初無路。誰信平如砥。臺中老比丘。碧眼照窗几。巉巖玉爲骨。凜凜霜入齒。機鋒不可觸。干偈如翻水。何須尋德雲。卽此比丘。是長生未可學。請學長不死。又題金山寺回文體詩云。潮隨暗浪雪山傾。遠浦漁舟釣月明。橋對寺門松徑小。檻當泉眼石波清。迢迢綠樹江天曉。靄靄紅霞晚日晴。遙望四邊雲接水。碧峯千點數鷗輕。

焦山

焦山在丹徒縣城東九里。舊名樵山。後漢焦先隱此。因改今名。孤聳江心。與金山並峙。上有清行宮。自然庵。松廖閣。夕陽樓。文昌閣。觀音閣。諸勝。有定慧寺。內藏周宣王時鼎。秦碣。西漢定陶鼎。蜀漢諸葛亮銅鼓等古物。

北固山

北固山在丹徒縣北門外五里許。一名北顧。石壁屹立。形勢雄壯。其南有太史慈墓。其西有走馬澗。蜀漢昭烈帝曾走馬於此。山有藏兵塢。晉蔡謨謝安統軍鎮此。在山上作庫。以儲軍資。舊有樓。爲蔡謨所建。梁武帝嘗登樓北顧。曰。此嶺下足須固守。然於京口。實乃壯觀。遂改樓曰北顧樓。其第一峯上有甘露寺。三國吳甘露年間建。寺屢毀。清彭剛直公玉麀重修之。始復舊觀。門內有天下第一江山六大字。刻石於壁。東有鐵塔。相傳爲唐李德裕所造。

五州山

五州山在丹徒縣西約二十里。晉時幽冀青并兗五州之人。避亂來寓。是山故名。上有千尺井。下通江水。山巔有老人峯。天鵝閣。翠巖室。滄江亭等諸勝。其地多產蘭草。

中泠泉

中泠泉在金山西麓。泉味清冽。唐陸羽評爲天下第一。上有石刻天下第一泉五字。泉舊在江心。沙岸既漲之後。在雲根島下。宋蘇軾書碧潭萬丈四字於巖上。

虎跑泉

虎跑泉在丹徒縣西南戴公山下。其上有唐駱賓王所書之碑。西有泉曰龍噴水。極奇勝。

黃鶴山

黃鶴山在丹徒縣南五里。一名黃鵠山。亦名戴公山。相傳戴顓嘗隱居於此。因以爲名。山南三里許有八公洞。洞口叢樹密護。多產禽鳥。其西有獅子窟。登其巔。可以望遠。

投金瀨

投金瀨在溧陽縣南五里。卽溧女飯伍子胥處。後子胥欲報之。不知其家。乃

投金於瀨中而去。初子胥自楚奔吳。乞食溧陽。適會女子擊綿於瀨水之上。筐中有飯。子胥飢甚。謂之曰。夫人可得一餐乎。女子知非恒人。發其篋。飯其盞漿。長跪而與之。子胥已餐。曰。掩夫人之壺漿。無令其露。女子嘆曰。妾獨與母居三十年。自守貞明。不願從適。何宜饋飯而與丈夫。越虧禮義。妾不忍也。子行矣。子胥行。及反顧。女子已自投於水中。

葦湖

葦湖在溧陽縣東南十五里。一名千里湖。卽陸機所謂千里葦蕘者。舊時湖中多產葦。

孫夫人梳妝臺

臺在北固山第一峯下。山有甘露寺。寺內有臺。相傳爲三國吳孫夫人梳妝舊址。

梁夫人播鼓處

梁夫人搗鼓處在金山東。宋韓世忠與金兀朮戰於江中。其妻梁夫人登船搗鼓。士氣百倍。大敗金人。

聽鷗山房

聽鷗山房在黃鶴山下。戴顓嘗居於此。亦名竹林精舍。相傳爲顓携雙楸斗酒聽鷗處。

望肅樓

望肅樓在丹徒縣東北門城上。相傳爲吳大帝望魯肅墓之處。魯肅墓在城東北桃花隴。今墓廢碑存。

西園

西園在丹徒縣治西。爲宋韓世忠故園。中有飛蓋亭、傳觴亭、凌雲臺、留仙洞等勝蹟。

研山園

研山園在丹徒縣城內東南隅。爲宋米芾故宅。岳珂卽其地築園。中有致爽軒。寶晉齋。

丁卯橋

丁卯橋在丹徒縣南。晉元帝時。運糧出京口。因水涸。運糧使奏請立埭。用丁卯日。後人於其地建橋。因名爲丁卯橋。唐許渾築別墅於橋側。曾有夜歸丁卯橋村詩。

藏春塢

藏春塢在丹徒縣清風橋東。本唐南潤州節度使林仁肇故宅。宋時郡中名士刁約因之築園。號藏春塢。中有逸老堂。西有萬松岡。司馬光詩。藏春在何處。鬱鬱萬松林。卽此蘇軾題詩云。白首歸來種萬松。待看千尺舞霜風。年拋造物陶甄外。春在先生杖履中。楊柳長齊低戶暗。櫻桃爛熟滴階紅。何時却與徐元直。共訪襄陽龐德公。

丹徒宮

丹徒宮在丹徒縣城內壽邱山。爲宋武帝微時故宅。後因築爲宮。有故井一。今尙存在。

鐵甕城

鐵甕城卽丹徒縣城樓。相傳爲吳大帝所築。唐杜牧之有詩云。城高鐵甕橫強弩卽此。

瘞鶴崖

瘞鶴崖在焦山。崖下有定慧寺。東廂亭中有瘞鶴銘。華陽真逸撰。字亦奇古。宋歐陽修以舊記稱王羲之所書爲非。又疑顧況號華陽真逸。或是況筆。至董道書跋。則謂陶宏景嘗居華陽。自號華陽隱居。爲宏景所書。

十一 通州

通州在揚州東南。地勢當揚子江尾閭之沖積層。低平無隘。溝渠紛錯。田土

肥沃。農產繁盛。州城瀕於揚子江北岸。南據狼山之險。與福山相對峙。爲江海間第一重門戶。

五公園

通州城內有公園五。分東南西北中。以中公園爲最勝。四面環水。係舊魁星樓址改造。

博物院

博物院在南通縣城南。內有各種古蹟。古字古畫。不可勝記。并玉瓷竹木飛潛動植等物。

狼山

狼山在南通縣城南十八里。上有望海樓。振衣亭。飛來石。山之東麓。有唐駱賓王墓。

軍山

軍山在南通縣城南十八里。上有古井一。曰白雲泉。水味甚甘冽。又有新築之氣象臺。

劍山

劍山在南通縣南狼山東。一名刀刃山。相傳秦始皇曾磨劍其上。東南巖下有煉丹臺。

玉涓泉

玉涓泉在如皋謹城內。卽今之禪寺井。宋王覲詩。覆欄常浸梧陰冷。煮茗猶存玉色寒。

海山樓

海山樓在南通縣南城上。相傳爲宋大觀中郡守朱彥所建。題額爲海山遠眺四字。

芙蓉園

芙蓉園在如皋縣南一里。園四圍皆深渠。中有方池土臺。秋深芙蓉盛開。人多遊賞之。

樓雲閣

樓雲閣在南通縣狼山寺前。閣後有橋曰望仙橋。宋時州人王覲字明叟。作記以紀之。

胡安定故宅

胡安定故宅在如皋縣南十里。俗呼其地曰胡家莊。有胡安定祠。殿中祀宋胡瑗。

名勝古蹟終



